



**Sud Bosne i Hercegovine**  
**Суд Босне и Херцеговине**

---

Broj: S1 3 Iž 038457 20 Iž  
Sarajevo, 27.10.2020.godine

Sud Bosne i Hercegovine, u vijeću Apelacionog odijeljenja sastavljenom od sudija Mirsade Džindo, kao predsjednika vijeća, Zvezdane Antonović i Srete Crnjaka, kao članova vijeća, odlučujući o žalbi Golijanin Nebojše Sestara Radovanović 11, 11272 Dobanovci, R Srbija, izjavljenoj protiv Odluke Centralne izborne komisije Bosne i Hercegovine broj: 05-1-07-1-998/20 od 01.10.2020.godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Lokalne izbore 2020.godine, u nejavnoj sjednici, održanoj dana 27.10.2020.godine, donio je

**R J E Š E N J E**

**Žalba se odbija.**

**O b r a z l o Ź e n j e**

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine po podnesenim prijavama do 01.09.2020. godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine. U odnosu na žalitelja odbijen je upis iz razloga što je isti registrovan na više različitih adresa.

Žalitelj je protiv navedene odluke blagovremeno izjavio žalbu u kojoj moli da mu se omogući glasanje izvan BiH na adresu koju je naveo u prijavi: Sestara Radovanović 11, 11272 Dobanovci, R Srbija.

Centralna izborna komisija Bosne i Hercegovine u odgovoru na žalbu predložila da se ista odbaci kao nedopuštena jer je izjavljena od neovlaštenog lica, odnosno da se odbije kao neosnovana.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da žalba nije osnovana.

Iz stanja spisa proizlazi da je Centralna izborna komisija BiH prije donošenja pobijane odluke, utvrdila da su za žalitelja dostavljene tri prijave i to jedna na PRP-1 Obrascu –Prijava za glasanje izvan BiH i dvije na PRP- 2 Obrascu potvrde prijave za glasanje izvan BiH u kojima su navedene različite adrese na koje će biti upućen glasački materijal. U konkretnom slučaju u Obrascu prijave za glasanje izvan BiH (PRP-1) navedena je adresa Kašice bb, 15320 Ljubovija, R Srbija, dok su u Obrascu potvrde prijave za glasanje izvan BiH (PRP-2) navedene adrese Sestara Radovanovića 11, 11272 Dobanovci, R Srbija i adresa Stanoja Glavaša 7, 11000 Beograd, R Srbija.

I po shvatanju apelacionog vijeća, druge dostavljene prijave žalitelja Golijanin Nebojše se ne mogu smatrati obaviješću o promjeni podataka u smislu člana 3.16 stav 1. Izbornog zakona BiH, s obzirom da podnositelj žalbe podnošenjem druge dvije prijave nije ukazao da ima saznanja o podnesenoj prvoj prijavi, kada bi se moglo cijeniti da druge podnesene prijave predstavljaju promjenu podataka o boravištu u inostranstvu.

Tačna adresa stanovanja državljanina BiH koji privremeno živi u inostranstvu, ima biračko pravo i upisan je u Centralni birački spisak, predstavlja obavezni element prijave propisan članom 3.15 stav 1 Izbornog zakona (Sl. glasnik BiH br.23/01 sa izmjenama). Državljanin BiH je shodno članu 3.16. stav 1 citiranog zakona obavezan Centralnu izbornu komisiju BiH obavijestiti o promjeni podataka koje je predhodno dostavio, i to do isteka roka utvrđeno za podnošenje prijave za glasanje van BiH.

Kako podnositelj žalbe nije dostavio Centralnoj izornoj komisiji BiH u smislu člana 3.15 stav 1. i 7. Izbornog zakona BiH, potvrdu nadležnog organa o prebivalištu/boravištu izvan BiH kako bi se sa sigurnošću moglo zaključiti da je adresa na kojoj zahtjeva da bude registrovan prava adresa njegovog prebivališta/boravišta u inostranstvu, to i prema shvatanju apelacionog vijeća Centralna izborna komisija BiH nije bila u mogućnosti da utvrdi koja je od podnesenih prijava vjerodostojna. Tu činjenicu je dužan dokazati podnositelj prijave u smislu navedene odredbe Izbornog zakona BiH. S tim u vezi, pravilna je i zakonita odluka Centralne izborne komisije BiH, da navedenom licu odbije upis u izvod iz Centralnog biračkog spiska za glasanje izvan BiH.

Napomene radi, žalitelju nije oduzeto biračko pravo za Lokalne izbore 2020. godine, nego samo mogućnost glasanja putem pošte izvan BiH, jer isti može glasati na redovnom biračkom mjestu u općini u kojoj ima prijavljeno prebivalište u BiH.

Radi gore izloženog, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

Predsjednik vijeća  
Sudija  
Mirsada Džindo